

BOSNA I HERCEGOVINA
FEDERACIJA BOSNE I HERCEGOVINE
ZENIČKO-DOBOJSKI KANTON
OPĆINSKI SUD U VISOKOM
Broj: 41 0 K 102893 24 K
Visoko, 08.10.2024.godine

U IME FEDERACIJE BOSNE I HERCEGOVINE

Općinski sud u Visokom, po sudiji Avdiji Avdić uz sudjelovanje zapisničara Sejdić Džemile, u krivičnom predmetu protiv optuženog Š.M. sina A. iz V. , zbog krivičnog djela neovlaštena proizvodnja i stavljanje u promet opojnih droga iz člana 238. stav 1. KZ F BiH, rješavajući po optužnici Kantonalnog tužilaštva-tužiteljstva Zeničko-dobojskog kantona broj T 04 0 KT 0056945 24 od 28.06.2024.godine, na pretresu za izricanje krivično pravne sankcije održanom u prisustvu Kantonalne tužiteljice Adine Karadža, optuženog Š.M.i branioca optuženog Lemeš Tarika, advokata iz Visokog , dana 08.10.2024.godine donio je i javno objavio:

P R E S U D U

OPTUŽENI: Š.M., sin A. i majke Š. rođene F., rođen ... godine u Z., nastanjen u ulici K. bb, grad V., JMB: ..., po narodnosti Rom, državljanin BiH, pismen, sa završenih dva razreda osnovne škole, po zanimanju radnik, nezaposlen, živi u vanbračnoj zajednici, otac jednog djeteta, vojsku nije služio, ne vodi se u vojnoj evidenciji, lošeg imovnog stanja, osuđivan presudom Županijskog suda Dubrovnik broj: K 17/07 od 18.09.2007. godine za krivično djelo zloupotreba opojnih droga iz člana 173. stav 2. KZ Hrvatske na kaznu zatvora u trajanju od 2 godine, presudom Općinskog suda u Mostaru broj: 58 0 K 075165 11 K od 15.10.2012. godine zbog krivičnog djela teške krađe iz člana 287. KZ F BiH na kaznu zatvora u trajanju od 10 mjeseci, uslovno dvije godine, presudom Osnovnog suda u Trebinju broj: 95 0 K 027956 13 Kps od 03.07.2013. godine zbog krivičnog djela krađe KZ RS na kaznu zatvora u trajanju od 60 dana, uslovno jedna godina, presudom Općinskog suda u Tuzli broj: 32 0 K 147067 12 K od 10.08.2013. godine zbog krivičnog djela iz člana 330. u vezi sa članom 31. KZ F BiH na kaznu zatvora u trajanju od dva mjeseca, presudom Općinskog suda u Visokom broj: 41 0 K 083328 20 K od 03.01.2021. godine zbog krivičnog djela iz člana 287. KZ F BiH na kaznu zatvora u trajanju od 11 mjeseci,

K r i v j e

što je,

dana 08.02.2024. godine, na području grada V., suprotno odredbama člana 4 stav 1, 2, 3 i 5 u vezi sa članom 19. i 20. Zakona o sprečavanju i suzbijanju zloupotrebe opojnih droga BiH, iako je znao i bio svjestan da je držanje opojne droge radi prodaje zakonom zabranjeno, to je i htio, pa je neovlašteno radi prodaje držao opojnu drogu i to: jedan bijeli pvc paketić zataljen na vrhu sa sadržajem materije bijele boje neto mase 5,107 grama, jednu prozirnu pvc vrećicu sa sadržajem materije bijele boje neto mase 45,314 grama, jednu prozirnu pvc vrećicu sa sadržajem materije bijele boje neto mase 2,312 grama, za koju praškastu materiju je vještačenjem utvrđeno da sadrži psihoaktivnu komponentu amfetamin, poznatiju kao opojna droga „Speed“, koja droga je pod rednim brojem 1 „Liste psihotropnih tvari“ iz tabele II/2 „Tvari i biljke pod strogom kontrolom“ proglašena takvom, te jednu metalnu kutijicu u kojoj se nalazila prozirna pvc vrećica i u njoj 17 tableta zelene boje u obliku domino pločica, a svaka tableta je posebno umotana u alufoliju, pojedinačne neto mase : 0,387 grama, 0,386 grama, 0,389 grama i 0,390 grama,a ukupne neto mase 6,747 grama, za koje tablete je vještačenjem utvrđeno da sadrže psihoaktivne komponente „metilendioksimetamfetamin-MDMA“, koja

droga je pod rednim brojem 12. liste psihotropnih tvari iz Tabele I/2 „Zabranjene tvari i biljke“ proglašena takvom, u namjeri da ovu drogu prodaje neodređenom broju lica, te kožnu crnu futrolu za vagu sa natpisom „Ming Heng Scale“ i u njoj jednu digitalnu vagu na čijoj se poleđini nalaze natpis „Capacity: 200 grama x 0.01 gram 500 grama x 0.1 gram“, a na prednjoj strani natpis „MH-127“ na kojoj su se nalazili tragovi materije bijele boje, koja opojna droga, tablete i vaga za precizno mjerenje su pronađeni i oduzeti od strane policijskih službenika PU II PS Visoko prilikom pretresa kuće i pomoćnih objekata u ulici K. bb, grad V., a po naredbi Općinskog suda u Visokom broj: 41 0 K 100895 24 Kpp od 08.02.2024. godine,

dakle, neovlašteno držao opojnu drogu radi prodaje,

čime je počinio krivično djelo Neovlaštena proizvodnja i stavljanje u promet opojnih droga iz člana 238. stav 1. KZ F BiH.

Pa sud optuženog na osnovu istog zakonskog propisa, uz prijenu članova 41.stav 1 tačka a) 42,43.,49 KZ FBiH,

OSUĐUJE

NA KAZNU ZATVORA U TRAJANJU OD 1(JEDNE)GODINE

Na osnovu člana 78. stav 1. i člana 238. stav 4. KZ F BiH, optuženom se izriče sigurnosna mjera oduzimanje predmeta i to: opojna droga amfetamin neto težine 52,733 grama, preostala nakon vještačenja, 5,167 grama (13 tableta) preostale nakon vještačenja i kožna crna futrola za vagu sa natpisom „Ming Heng Scale“ i u njoj jedna digitalna vaga na čijoj se poleđini nalaze natpis „Capacity: 200 grama x 0.01 gram 500 grama x 0.1 gram“, a na prednjoj strani natpis „MH-127“, a koja opojna droga i digitalna vaga se nalaze deponovane u PS Visoko , koja će se uništiti pred Povjerenstvom za uništenje oduzetih opojnih droga, psihotropnih tvari, biljaka iz kojih se mogu dobiti opojne droge i prekursora posredstvom MUP-a ZDK, PS Visoko u čijem se posjedu i nalaze.

Na osnovu člana 202. stav 4. ZKP FBiH, optuženi se oslobađa plaćanja troškova krivičnog postupka i isti padaju na teret sredstava suda.

Obrazloženje

Kantonalno tužilaštvo Zeničko-dobojskog kantona (u daljem tekstu KT ZDK), optužnicom br T 04 0 KT 0056945 24 od 28.06.2024.godine , optužilo je Musić Ševku , zbog krivičnog djela Posjedovanje i omogućavanje uživanja opojnih droga člana 239. stav 3. KZ FBiH, (Službene novine Federacije BiH br. 36/03, 37/03, 21/04, 69/04, 18/05, 42/10, 42/11, 59/14, 76/14, 46/16 i 75/17), (dalje u tekstu KZ FBiH).

Optužnica je potvrđena od strane sudije za prethodno saslušanje ovog suda dana 05.07.2024.Na ročištu o izjašnjenju o krivnji dana 18.09.2024, optuženi Š.M. je izjavio da je kriv za krivično djelo neovlaštena proizvodnja i stavljanje u promet opojnih droga iz člana 238. stav 1. KZ F BiH.

Na ročištu o razmatranju izjave o priznanju krivnje dana 18.09.2024.godine sud se uvjerio da je optuženi Š.M. izjavu o priznanju krivnje dao dobrovoljno, svjesno i sa razumijevanjem, kao i nakon upoznavanja o mogućim posljedicama ovog krivičnog postupka.

Sud je utvrdio da ima dovoljno dokaza o krivnji optuženog, nakon čega je prihvatio izjavu o priznanju krivnje optuženog i istovremeno odredio pretres za izricanje krivično pravne sankcije.

Sud je stekao uvjerenje da je optuženi Š.M. počinio krivično djelo koje mu se stavlja na teret, a koje djelo je izvršeno na način, u vrijeme i u mjestu kako je to navedeno u dispozitivu ove presude nakon izvršenog uvida u predočene dokaze i to : zapisnik o ispitivanju osumnjičenog Š.M. PU II PS Visoko broj: 08-02-09/1-201/24 od 08.02.2024. godine, zapisnik o saslušanju svjedoka P.D. PU II PS Visoko broj: 08-02-09/1-205/24 od 09.02.2024. godine, te Nalaz i mišljenje FUP Sarajevo Centar za forenzička ispitivanja, vještačenja i istraživanja Odsjek za hemijsko-toksikološka i fizikalna ispitivanja, istraživanja i vještačenja broj: 09-18/2-03-5-372 od 20.03.2024. godine, naredba za pretres Općinskog suda u Visokom broj: 41 0 K 100895 24 Kpp od 08.02.2024. godine, potvrda o privremenom oduzimanju predmeta PU II PS Visoko broj: 08-02-09/1-50/24 od 08.02.2024. godine na ime Š.M., zapisnik o pretresanju stana, drugih prostorija i pokretnih stvari PU II PS Visoko broj: 08-02-09/1-12/24 od 08.02.2024. godine, Odobrenje Kantonalnog tužilaštva broj: T04 0 KTA 0056945 24 od 09.02.2024. godine, Naredbu za vještačenje Kantonalnog tužilaštva broj: T04 0 KTA 0056945 24 od 09.02.2024. godine, zapisnik o otvaranju i pregledu privremeno oduzetih predmeta i dokumentacije PU II PS Visoko broj: 08-02-09/1-41/24 od 09.02.2024. godine i izvod iz kaznene evidencije za osumnjičenog Š.M. PU Zvornik broj: 19-02/1-234.1-137/24 od 20.02.2024. godine, fotodokumentaciju PU II PS Visoko broj: 08-02-03/1-41/24 od 08.02.2024. godine sa datumom izrade od 16.04.2024. godine, koja se odnosi na pretres i fotodokumentaciju PU II PS Visoko broj: 08-02-03/1-41-1/24 od 09.02.2024. godine sa datumom izrade od 16.04.2024. godine, koja se odnosi na otvaranje privremeno oduzetih predmeta.

Naime, priznanjem optuženog koje je u potpunosti i u skladu sa predočenim dokazima, nesporno je dokazano da je isti počinio krivično djelo koja mu se stavlja na teret.

Sud zaključuje da je optuženi navedeno krivično djelo počinio sa direktnim umišljajem, jer je bio svjestan svog djela i htio njegovo izvršenje, a sud u toku postupka nije posumnjao da na strani optuženog postoje okolnosti koje bi dovele u pitanje uračunljivost optuženog, jer iz predočenih dokaza ne proizilazi sumnja da optuženi nije bio u mogućnosti da shvati značaj svojih djela i da upravlja svojim postupcima u vrijeme izvršenja djela.

Stoga je sud optuženog oglosio krivim za navedeno krivično djelo i izrekao mu krivično pravnu sankciju.

Prilikom izricanja krivično pravne sankcije sud je cijenio optuženom Š.M. kao olakšavajuće okolnosti činjenicu da je priznao izvršenje krivičnog djela koje mu se stavlja na teret, čime je u mnogome doprinio utvrđivanju činjeničnog stanja i skraćanju krivičnog postupka, dok je na drugoj strani sud od otežavajućih okolnosti cijenio da je optuženi osuđivan.

Cijeneći utvrđene okolnosti na strani optuženog, sud je optuženom uz primjenu članova 41.stav 1 tačka a) 42,43.,49 KZ FBiH, izrekao kaznu zatvora u trajanju od 1(jedne) godine , u uvjerenju da će se istom, ostvariti svrha kažnjavanja predviđena u članu 42. KZ FBiH, te postići kako opća, tako i specijalna prevencija.

Na osnovu člana 78. stav 1. i člana 238. stav 4. KZ F BiH, sud je optuženom Š.M. izrekao sigurnosnu mjeru oduzimanje predmeta i to: opojna droga amfetamin neto težine 52,733 grama, preostala nakon vještačenja, 5,167 grama (13 tableta) preostale nakon vještačenja i kožna crna futrola za vagu sa natpisom „Ming Heng Scale“ i u njoj jedna digitalna vaga na čijoj se poledini nalaze natpis „Capacity: 200 grama x 0.01 gram 500 grama x 0.1 gram“, a na prednjoj strani natpis „MH-127“, a koja opojna droga i digitalna vaga se nalaze deponovane u PS Visoko , koja će se uništiti pred Povjerenstvom za uništenje oduzetih opojnih droga, psihotropnih tvari, biljaka iz kojih se mogu dobiti opojne droge i prekursora posredstvom MUP-a ZDK, PS Visoko u čijem se posjedu i nalaze.

Na osnovu člana 202. stav 4. ZKP FBiH, sud je optuženog oslobodio plaćanja troškova krivičnog postupka i isti padaju na teret sredstava suda.

Sudija
Avdija Avdić

POUKA: Protiv ove presude dozvoljena je žalba Kantonalnom sudu u Zenici, putem ovog suda, u roku od 15 dana od prijema presude, u tri primjerka.